



Ensemèn sin tribuna han las autoritads da Scuol e da Zernez persequità la discussiun dal parlament davart lur duas fusiuns.



Ils capos da las duas vischnancas fusiunadas: da Scuol Christian Fanzun (san.) e da Zernez Emil Müller, en discussiun.

FOTOS F. ANDRY

Gratulaziuns per il curaschi da las vischnancas

Cussegl grond ha approvà las fusiuns da Scuol e Zernez

■ (anr/fa) A partir da Bumaun 2015 consista l'Engiadina Bassa mo pli da quatter vischnancas. Sper las vischnancas Valsot e Samignun datti alura mo pli Scuol e Zernez. Mesemna ha tractà il cussegl grond la missiva per la fusiun da las vischnancas Ardez, Ftan, Guarda, Scuol, Sent e Tarasp a la nova vischnanca fusiunada cun num Scuol. Medemamain ha el tractà era la fusiun da las vischnancas Lavin, Susch e Zernez a la vischnanca fusiunada Zernez. La terza fusiun da vischnancas è stada la fusiun d'Arvigo, Braggio, Cauco e Selma a la vischnanca numnada Calanca. Essend che las trais vischnancas fusiunadas entran en vigur a Bumaun 2015 ha il chantun Grischun proxim onn anc 125 vischnan-

cas. Las duas vischnancas fusiunadas en Engiadina Bassa, Scuol e Zernez, èn vegnidas approvadas dal suveran mintgamai cun 80 pertschient da las vuschs.

Scuol la pli gronda vischnanca en Svizra

Cun ina surfatscha da 43 877 hectaras vegn ad esser la vischnanca Scuol cun il capo *Christian Fanzun* la pli gronda vischnanca en tut la Svizra. Quai na vala però per il dumber d'abitants. Cun excepziun da Scuol, posiziunà sin 1250 meters sur mar e che aveva l'onn 2012 2333 abitants, han las autras tschintg vischnancas tuttas damain che milli abitants: Ardez ch'è posiziunà sin stgars 1500 meters sur mar aveva avant dus

onn 426 abitants, Ftan sin 1600 meters 532 abitants, a Guarda sin 1650 meters abitavan 161 persunas, Sent sin 1440 meters sur mar aveva 903 abitants e Tarasp che sa chatta da la vart dretga da la Val sin 1400 meters aveva quel onn 70 abitants. Totalmain ha la vischnanca fusiunada Scuol bundant 4700 abitants. Cumenzà a discussiunar davart ina colavuraziun pli intensiva, ina fusiun, han gia avant l'onn 2010 las quatter vischnancas Scuol, Sent, Ftan e Tarasp. L'onn 2012 han ins engaschà *Tino Zanetti* sco cusseglader extern. Pli tard è vegnida tiers la vischnanca d'Ardez e sco ultim Guarda. Cun passa 80 pertschient han acceptà ils abitants da las sis vischnancas la fusiun. Il chantun sustegna

la fusiun cun in import da 10 milliuns francs.

Zernez cun il pli bler gaud

L'onn 2008 han cumenzà a discussiunar Zernez, Susch, Guarda e Lavin da fusiunar lur vischnancas. Suentar ch'ils votants d'Ardez e Guarda han preferì la fusiun «vers aval», cun Scuol e vischnancas vischinas, hai dà ina fusiun da Zernez, Susch e Lavin. La primavaira han las abitantas ed ils abitants ditg cun stgars 80 pertschient gea a questa fusiun a la vischnanca fusiunada cun num Zernez e cun il president communal *Emil Müller*. La fracziun Zernez è posiziunada sin 1474 meters sur mar ed ha ina surfatscha da 20 391 hectaras. 3705 da quellas hectaras

èn gaud, da maniera che Zernez è en Svizra la vischnanca cun il pli bler gaud. L'onn 2012 aveva Zernez 1150 abitants. Susch al pè dal Pass dal Flüela sa chatta sin 1440 meters ed aveva avant dus onns 214 abitants. A Lavin ch'è sin 1430 meters sur mar abitavan avant dus onns 233 persunas. La vischnanca fusiunada Zernez cun stgars 1600 abitants survegn dal chantun in sustegn finzial da trais milliuns francs. Mesemna ha il cussegl grond approvà unanimamain e senza abstenziuns da la vusch las duas fusiuns Scuol e Zernez per Bumaun 2015. Il medem vala era per la vischnanca Calanca. La cusseglia governativa *Barbara Janom Steiner* ha dà il bainvegnì a las trais novas vischnancas grischunas.